

ChOL GARZETTE BLANQUE

Li, i vivoait tout seu, din chol vieille moaison démanglée qu'il avoait héritée d'és mère. Tout seu, au mitan d'chés mérais, peuve, peuve comme a n'est point permis. Tojours tout seu : il avoait bu ch'vin à chés noces éd ses compains, mais janmoais à l'sienne.

Et pi un soér, un soér éd l'aprézeut, qu'i sintoait l'tristèche et pi l'solitude qui poaisoait't su s'poétrin-ne, à ch'coin d'ésn écminée, il o sorti déhors, prin-ne l'air, erbéyer chés étoèles, pour és sentir miu, oblir, én fuche qu'un momint, oblir l'misère, oblir él désespoér qui vos étran-ne, qui vos étoque, des coeups, comme o, quante o n'in peut pu d'vive tout seu.

Tout d'un coeup il o intindu un buzin du diabe au mitan d'chés rosieux. I s'a apprechè : ch'étoait inne garzette blanche, avec inne patte éd prinse din un piérge.

A l'clertè d'chol leune, il o peu vir éq chol garzette blanche al avoait inne houppe rouge audsu d'és tête.

Li qu'portant, édpi tout piot, i con-naichoait tous chés bétails d'éch mérais, à pleumes et pi à poéilles, chés pichons, chés moénieux, janmoais i n'avoait rincontré un oésieu comme échtilo : inne garzette blanche, avec inne taque rouge, comme inne couron-ne su s'tête.

I s'a bachè, tout duchmint, délicatmint, il o libéré chol patte meurdrie. Il o enveloppè chl'oésieu affolè, tran-nant, guerlottant, din s'vieille casaque éflépée. Chol garzette al o posé sin bé su sn'épeule, comme pour él l'ermancier...

Pindant quique temps, i ll'o songnè, coatè, ch'moénieu blanc, afulè d'rouge. Avec quiques bouts d'bos pi dol fichelle, i li o foait inne attelle à s'patte. I ll'o norrie, nettiée, aflatée, rassurée.

Au bout d'sécants jours, al étoait ratampie, su ses deux pattes, pi malgré qu'al boétillait coér un molé, al étoait quasimint djérie... N'impèque, un bieu matin : « FLOUF ! »... al o clatchè ses ailes, et pi, a s'a rinvolée, din ch'temps tout bleu, au-dlo d'éch mérais.

L'hiver il o tcheu, froéd, glachè, copant. Li, i rétoait tout seu, din s'cahute déglindjée, qu'al wignoait, qu'al wipoait, sous chés maques d'éch vint maouais.

Inne foés, qu'i s'avoait coutchè d'boéne heure su s'paillasse in rosieux, pour povoér és récoeuffer, oz o butchè à chol porte : tchèche éq cha pavoait-ti éte ?

Oz o rbutchè : troés foés. I s'a dessatchè, il o infilè s'maron-ne, ses coeuchures, és casaque. Il o sorti déhors.

Din chés neiges, il o aperchu des traches, des traches éd pos. I zz'o suis, dusqu'à chol grange. Il o poussé chol porte, alleumè chol lanterne...

Lo, couchée din ch'feurre, i y avoait... inne feume ! Inne feume avec des longs gveux roux, quasimint rouges, essantchée, ercran-ne, ténée. I ll'o prins din ses bros, i ll'o ramnée à s'moaison. Al étoait ljére conme du vint, conme un moénieu casvel...

Il o ralleumè ch'fu. I ll'o récoeuffée, déberbouillée. I ll'o songnée, apatelée. A s'laichoait foaire, avec din ses zius inne tindrèche infinie.

Et pi, i li o nmandè si qu'al vodroit rester avec li. Al o foait singne éq « oui ».

Et pi chés jours iz ont passè, mais ch'étoait toudi la misère. El pèque, chés fagots, a n'rapportait mie grand-cose : quasimint rien. Alors', chol feume, un coeup, al o dit qu'al porroit li bailler un molé d'ayude : i folloit seulmint qu'i li trove un rouet pi un métier : avec, al porroit filer, tisser des cmises, des cotrons, des casaques, et pi zzés rvin-ne.

Il o réuchi à déteuper un viu rouet, pi un viu métier d'bos à mitan matchè à z'artaises, qu'il o cafadè, et pi q'il o ahansè din chol grange, mais elle, al li o foait pronnette d'én janmois, janmois vnir él l'erbéyer travailler.

Chol feume a s'met don à l'ouvrage, al s'infreume din chol grange, et pi, long du jour... « FERLIC, FERLAC !... KERLIC, KERLOC !... », al tisse...

Au soér, quante al sorte, al san-ne ercran-ne, al est tout blanque, al calioche.

El lin-nmain, al est d'pu in pu ténée.

El troésième jour, quante a s'dessaque, au vrèpe, al o din ses bros inne pièche éd drop d'inne bieuté increuyabe, inrécompérabe : blanque, ergintée, tellemint fin-ne, qu'o diroait dol soée.

Li, i n'o point ieu d'mau à l'vin-ne su ch'martché : il o recouè inne borse plein-ne d'échus in or. I li o nmandè d'n'in rfoaire inne eute..

Adon, chol feume a s'rinfreume din s'grange pour ercmincher sn'ouvrage, mais au soér, quante al sorte, ch'est à pein-ne si al tient coér édbout, al canchelle. A n'o meume pu l'forche éd minger : a s'couque, et pi ch'est toute.

Echt honme i n'comprend point. Il o sin sang rtornè. Pèr nuit, i n'arrive point à deurmire. I vodroit savoér. Inne tchuriosité malin-ne a s'infique din s'chervelle in fu.

El jour d'apreu, il o tellemint grafin d'savoér, qu'i n'peut pu s'atnir : i vo aplacher sin ziu à un treu din chés planques, pour él miler...

Mon diu ! Mon diu manman !... Din chol grange, i y o inne gran-ne garzette blanque, avec un toupet mervéle su sin front ! Et pi ch'est lo qu'i voét, ch'est lo qu'i s'apercheut éq chatchun d'chés fils qu'al tisse, ch'est inne pleume qu'al défique d'és poétrin-ne, avec sin bé...

Mais chl'oésieu il o sintu sin rguèrd. I lève és tête couron-née d'rouge :

- Tu n'avoais point l'droét ! T'avoais pronmis !

Et pi ch'grand moénieu blanc il o bzinè déhors, tout caliochant, il o clatchè ses ailes, et pi...
« FLOUF ! »... i s'a rinvolè din chés nuées...

Lo, din chol grange, cht'honme il o rétchupèrè ch'bieu tissu blanc qu'il avoait tcheu à terre. I ll'o
inteursillè su ses épeules. Il o sorti déhors, et pi... « FLOUF ! »... A sin tour i s'a involè, pour s'in aller
rtrovoér, là-bos, au-dlo d'chés mérais, din chés avanteurs d'éch temps, l'eute mitan d'li-meume.

LEXIQUE

Garzette : aigrette

Démanglèe : démantibulées

Aprézeut : automne

Poésoait't : pesaient

Ebéyer : regarder

Én fuche : ne serait-ce

Étran-ne : étrangle

Étoque : étouffe

Buzin : vacarme

Leune : lune

Moénieux : oiseaux

Échtilo : celui-là

Taque : tache

Bachè : baissé

Affolè : blessé

Tran-nants : tremblants

Éflépée : effilochée

Bé : bec

Sognè : soigné

Coatè : dorloté

Afulè : coiffé

Nettièe : nettoyée

Aflatèe : caressée

Sécants : quelques

Ratampie : rétablie

Au-dlo : au-delà

Tcheu : tombé

Rétoait : était à nouveau

Maques : gifles

Butchè : frappé

Tchèche : qui

Traches éd pos : traces de pas

Suis : suivis

Feurre : paille

Gveux : cheveux

Essantchèe : exsangue

Ecran-ne : fatiguée

Ténèe : épuisée

Ljère : légère

Casvel : fragile

Apatelée : nourrie

Ticher : tisser

Déteuper : trouver

Matchè à z'artaises : vermoulu

Ahansè : installé

San-ne : semble

Calioche : titube

Au vrèpe : le soir

Inrécompérabe : incomparable

Soèe : soie

Vin-ne : vendredi

Récouè : récupéré

S'infique : s'immisce

Grafin : hâte

S'atnir : se retenir

Aplacher : placer

Miler : observer

Toupet : huppe

Mervéle : vermeille

Tiche : tisse

Bé : bec

Bzinè : filé

Tcheu : tombé

Inteursillè : enveloppé

Au-dlo : au-delà

Avanteurs d'éch temps : profondeurs du ciel

L'eute mitan : l'autre moitié

